

HUGHES, JOHN (1776 - 1843), gweinidog Wesleiaidd, a hynafiaethydd

Enw: John Hughes
Dyddiad geni: 1776
Dyddiad marw: 1843
Rhiant: Elizabeth Hughes (née Thomas)
Rhiant: William Hughes
Rhyw: Gwryw
Galwedigaeth: gweinidog Wesleiaidd, a hynafiaethydd
Maes gweithgaredd: Crefydd; Hanes a Diwylliant; Ysgolheictod ac Ieithoedd
Awdur: Robert Thomas Jenkins

Ganwyd yn Aberhonddu, 18 Mai 1776, mab i William Hughes, hetiw'r, o'i ail wraig Elizabeth Thomas, o Dan-y-cefn gerllaw Aberhonddu; ar garreg fedd ei thad John Thomas ([Jones](#), *History of the County of Brecknock*, 3ydd arg., iv, 159), a fu farw yn 1757 yn 55 oed, gelwir ef yn 'gent.'; aeth ei brawd John (1752 - 1829) i Rydychen, a bu'n ficer Caerlleon-ar-Wysg (1784?-1829). Yn 1778, aeth John Hughes i ysgol Coleg Crist, dan [David Griffith](#). Yn 1790 (*Eurgrawn*, 1809, 445), clywodd John Wesley 'n siarad yn y seiat yr oedd ef a'i dad yn aelodau ohoni - noder bod Wesleiaid (Saesneg) Aberhonddu 'n dda eu byd a'u safle; gweler yr ysgrifau ar [Bold Churchey](#), a [Coke](#). Ond anfodlon fu'r tad pan fynodd y bachgen gefnu ar yr urddau eglwysig y gallesid disgwyl i'w gysylltiadau a'i addysg arwain iddynt, a bwrw'i fryd, ar waethaf perswâd ei ewythr, ar fod yn gynghorwr Wesleiaidd (1796). Yn 1800 anfonwyd ef i'r genhadaeth Gymraeg newydd yng Ngogledd Cymru, dan [Owen Davies](#). Llwyddodd yn rhyfeddol yno, pan gofiwn mai dyn llyfrgar oedd ef, na bu erioed yn bregethwr hwyliog, ac yn wir nad oedd yn Gymreigiwr rhugl; ond â'r dycnwch a welwyd eisoes (1792-6) ynddo, gorchfygodd yr holl rwystrau hyn, ac yr oedd i dyfu'n ysgrifennwr Cymraeg digon teilwng serch nad yn rhywiog. Ar brydiau, byddai ei dymheredd yn peri iddo wingo dan bregethu 'diwygiadol' rhai o'i gydefnyglwyr yn y Gogledd; ac nid ymddengys chwaith ei fod yn ddiddig dan benarglwyddiaeth [Owen Davies](#). Pan ymestynnwyd maes y genhadaeth, yn 1805, i Ddeheudir Cymru, [Owen Davies](#) eto a oedd i fod yn ben. Manteisiodd Hughes ar gyfle i gael ei enwi'n ddirprwy-arolygydd cylchdaith (Saesneg) Caerfyrddin, gan obeithio llywio cenhadaeth Gymraeg oddi yno, ond ffromodd [Coke](#) wrtho am hyn, a chafodd ei symud i Loegr. Yno (oddiethr am ysbaid yn Rhuthyn yn 1809) y bwriodd weddill ei oes. Ymdeolodd yn 1832, a bu farw yn Knutsford, 15 Mai 1843.

Gweithiodd Hughes yn ddyfal i ddarparu llenyddiaeth - yn gyfieithiadau ac yn waith gwreiddiol - i'r enwad Cymraeg newydd. Heblaw pamffledau, pregethau, ac esboniadau (rhestrau yn *Geiriadur Bywgraffyddol o Enwogion Cymru*, i, 557-8, ac yn y *Cardiff Catalogue*), detholodd emyniadur Cymraeg, *Diferion y Cysegr* (Caerlleon Fawr, 1802); emynau gweddol yw ei emynau ef ei hunan. Er nad oedd yn olygydd *Yr Eurgrawn* (a gychwynwyd yn 1809), ysgrifennodd y rhagymadrodd iddo, a chyfrannai iddo mor ddiweddar â 1842. Ond effaith ei alltudiaeth arno fu dwysáu ei gariad at iaith a hanes Cymru. Daeth yn gefnogwr selog i eisteddfodau 'r cyfnod hwnnw, ac yn gyfaill i w r fel [Thomas Price](#), [Rice Rees](#), a [W. J. Rees](#): gohebai â'r rhain. Yn 1818 a 1819 cyhoeddodd lyfr sylweddol mewn dwy gyfrol, *Horae Britannicae*, a enillodd glod gan [Sharon Turner](#) ac eraill; ac yn 1822 *An Essay on the Ancient and Present State of the Welsh Language*; yn ddiweddar ar ei fywyd, bwriadai gyhoeddi cyfrolau eraill. Wrth raid, y mae'r llyfrau hyn bellach wedi llwyr heneiddio, eto y mae'r clod yn ddyledus i'w hawdur encilgar am y diwydrwydd, yr ysgolheictod, a'r eangfrydedd a'i nodweddi.

Awdur

Yr Athro Emeritus Robert Thomas Jenkins, (1881 - 1969)

Ffynonellau

Hunangofiant (hyd 1810) anghyhoedd (*NLW MS 3501*)

Wesleyan Methodist Magazine (1822–1913), 1847 (cofiant, gan R. Jackson)

Yr Eurgrawn Wesleyaidd, 1848, 1849 ('Gwilym Lley'n,' ar sail yr hunangofiant)

The literary remains of the Rev. Thomas Price, Carnhuanawc, 1854-5, ii - chwili'r y fynegai

A. H. Williams, *Welsh Wesleyan Methodism, 1800-1858 its origins, growth and secessions* (1935), 1935 - chwili'r y fynegai

Bathafarn cylchgrawn hanes yr Eglwys Fethodistaidd yng Nghymru, 1950

Dolenni Ychwanegol

VIAF: [54578036](#)

Wikidata: [Q18671850](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

